



Láhkaásahus guovttegielatvuodadoarjaga birra sámegielaide hálddašanguovllu suohkaniidda/gielddaide ja fylkkagielddaide

Sámedikkis lea váldi mearridit láhkaásahusaid doarjagiid juogadeami ja geavaheami birra. Dát váldi lea mearriduvvon sámelága § 2-1, goalmmát lađđasa olis.

§ 1 Ulbmil ja ulbmiljoavku

Ortnega ulbmiljoavkun leat suohkanat/gielddat ja fylkkagielddat mat gullet sámegielaide hálddašanguvlui.

Ortnega ulbmil lea ahte guovttegielatvuodadoarjja suohkaniidda/gielddaide ja fylkkagielddaide galgá váikkuhit dasa ahte sámegielaide hálddašanguovllu gielddat ja fylkkagielddat galget bálvalit álbmoga sámegillii ja čalmmustahttit sámegiela, geatnegasvuoda mielde mii boahká ovdan sámelága goalmmát kapihttalis.

Suohkanat ja gielddat galget lágidit dilálašvuodaid dasa ahte eanet ássit besset atnit sámegiela. Gielddat galget ovdánahttit sámegiela geavatlaš gielladoaimmaid bokte.

Fylkkagielddat galget nannet ja ovdánahttit sámegiela gielladoaimbajuid bokte.

§ 2 Ulbmilolaheami eavttut

- Sámegielat mánáid ja ohppiid lohku mánáidgárddiin ja skuvllain olles logu ektui
- Gieldda vásáhus guovttegielat bargiid ja guovttegielat fálaldagaid hárrái.

§ 3 Ohcan

Doarjjavuostáiváldi galgá ohcat njuolggodoarjaga čuovvovaš jahkái, dan áigemearrái maid Sámediggi lea bidjan ohcanportálii.

Vai doarjaga sturrodat sáhtta meroštallojuvvot, de lea eaktun ahte čuovvovaš diedut almmuhuvvojit jahkásaš ohcamiin:

- Galli oahppis lea sámegiella vuosttašgiellan almmolaš ja priváhta vuodđoskuvllain suohkanis/gielddas.
- Galli oahppis lea sámegiella nubbingiellan almmolaš ja priváhta vuodđoskuvllain suohkanis/gielddas.
- Galle oahppi leat oktiibuot almmolaš ja priváhta vuodđoskuvllain suohkanis/gielddas.

- Galle máná gielddas leat priváhta dahje almmolaš sámi mánáidgárddiin dahje ossodagain.
- Galli mánás gielddas lea sámegieloahpahuš almmolaš dahje priváhta mánáidgárddiin.
- Galle máná gielddas leat oktiibuot almmolaš ja priváhta mánáidgárddiin.
- Čilgehus das makkár ovttaskas doaimmat ja prošeavttat galget ruhtaduvvot guovttegielatvuodádoarjagiin, ja juohke poastta gollomeroštallan.

§ 4 Suohkaniid/gielddaid plánat

Gielddat galget Sámediggái sáddet plánaid mat guoskkahit sámegiela, gč. sámelága § 3-13.

§ 5 Meroštallannjuolggadus – gielddat/suohkanat

Jahkásaš doarjja sámegielaide hálldašanguovllu gielddaide juolluduvvo čuovvovaš meroštallančoavdaga mielde:

Oassi doarjagis, vuodđodoarjja, addo dihto summan gielddaide suohkankategoriija mielde. Dát summa lea 60 % ollislaš doarjagis.

Vuodđodoarjja gielddaide juogaduvvo gorálaččat máksinsummaid vuodul iešguđetge gildii čuovvovaš juohkomeiid mielde:

- 50 % giellaovdánahttinsuohkaniidda.
- 35 % giellaealáskahttinsuohkaniidda.
- 15 % giellamovttiidahttinsuohkaniidda.

Ieš guhtetge suohkana summa rehkenastojuvvo dainna lágiin ahte oktii bidjá ovtta suohkana vuodđodoarjagiid guđege suohkankategoriijas. Dát summa šaddá proseantajuogu vuodđun. Vuodđodoarjja lea ovtta meari buot suohkaniidda guđege suohkankategoriijas.

Bálvalusoassi, mii dahká 40 % ollislaš doarjagis, juogaduvvo gorálaččat dainna lágiin:

- 50 % doarjagis juhkkojuvvo dan mielde man stuora oasis vuodđoskuvlaohppiin lea sámegiella vuosttašgiellan.
- 15 % doarjagis juhkkojuvvo dan mielde man stuora oasis vuodđoskuvlaohppiin lea sámegiella nubbingiellan.
- 30 % doarjagis juhkkojuvvo dan mielde man stuora oasis mánáidgárdemánáin lea sámi mánáidgárddis/ossodagas.
- 5 % doarjagis juhkkojuvvo dan mielde man stuora oasis mánáidgárdemánáin lea sámegieloahpahuš mánáidgárddiin.

§ 6 Meroštallannjuolggadus – fylkkagielddat

Jahkásaš doarjja sámegielaide hálldašanguovllu fylkkagielddaide juolluduvvo čuovvovaš meroštallančoavdaga mielde:

60 % doarjagis juolluduvvo ovtta meari buot fylkkagielddaide.

10 % doarjagis juhkkojuvvo dan mielde galli sámegielas fylkkagielddas lea ovddasvástádus.

30 % doarjagis juhkkojuvvo dan mielde galle gieldda/suohkana fylkkas gullet sámegielaid hálddašanguvui.

§ 7 Doarjja giellaovdánahttindoaimmaide

Gielddat ja fylkkagielddat galget atnit gaskal 20 % ja 30 % ollislaš doarjagis giellaovdánahttindoaimmaide.

§ 8 Liigedoarjja

Suohkanat, gielddat ja fylkkagielddat sáhttet ohcat liigedoarjaga. Liigedoarjja addojuvvo Sámedikki politihkalaš vuoruhemiid mielde.

§ 9 Eavttut

Guovttegielatvuodadoarjja ii galgga adnot gokčat goluid sámegieloahpahussii mii lea geatnegahttojuvvon oahpahuslága § 3-2 mielde, go Oahpahusdirektoráhta doarjja sámegieloahpahussii galgá gokčat skuvlaeaiggáda goluid giellaoahpahussii vuodđoskuvllas. Dát mearkkaša ahte guovttegielatvuodadoarjja ii sáhte adnot dábálaš oahpaheaddjebálkán, ii oahpponeavvoráhkadeapmái, ii ge vuodđoskuvlla hálddašangoluide. Guovttegielatvuodadoarjja sáhtta datte adnot vuodđoskuvlla eará giellaovdánahttindoaimmaide.

Doarjja ii sáhte adnot doaibmabijuid duppalruhtadeapmái.

Das gii vuolláičállá ohcama ja dohkkeha doarjaga eavttuid ferte leat váldi geatnegahttit suohkana/gieldda/fylkkagieldda.

Doarjja ii galgga adnot reguleret suohkana/gieldda/fylkkagieldda likviditehta. Ii leat vejolaš ovddidit máksimiid, nu ahte doarjjavuostáiváldi sáhtášii bidjat doarjjaruđaid rentehatti bánkokontoi dahje loatnamáksimii nu ahte doarjjaruđas boadášii dias.

Jus doarjjavuostáiváldi rihkku doarjaga eavttuid, de sáhttet buot eará doarjjamáksimat Sámedikkis dollejuvvot, dassášii go rihkkun lea loahpahuvvon.

100 % doarjagis máksojuvvo bušeahhtajagi álggus. Doarjjamáksin dollejuvvo jus doarjjavuostáiváldi ii leat doallan raporterenaigemiid dahje jus ii leat sádden ohcama Sámedikki doarjjavuogádaga bokte.

§ 10 Dialogačoahkkinn

Galget dollojuvvot jahkásaš dialogačoahkkimat Sámedikki ja njuolggodoarjagiid vuostáiváldiid gaskka. Dáid čoahkkimiid ulbmil lea digaštallat doarjjavuostáiváldiid doaimma, erenoamážit guoskevaš jagi doaimmaid, movt guovttegielatvuodadoarjagat leat adnojuvvon čadahit doaimmaid, ja movt dát lea váikkuhan suohkanplánaid ja Sámedikki doarjjaortnega ulbmiliid joksama.

§ 11 Doarjaga ruovttoluotta geassin ja ruovttoluotta máksin

Jus doarjaga eavttut eai leat devdojuvvon, de ii sáhte doarjjavuostáiváldi rehkenastit oažžut njuolggodoarjaga čuovvovaš jagi.

Sámediggi sáhtta ruovttoluotta geassit doarjaga dahje gáibidit ruovttoluotta máksojuvvot doarjaga jus:

- Doarjjavuostáiváldi lea rihkkon diedihangeatnegasvuoda.
- Doarjja ii geavahuvvo eavttuid mielde mat bohtet ovdan doarjjareivves.

- Doarjja ii leat geavahuvvon juolludeami ulbmila mielde.
- Lea máksojuvvon beare olu doarjja.

Jus doarjjavuostáiváldi ii mávsse ruovttoluotta dákkár oktavuodain, de sáhtta Sámediggi vuolggahit rievttálaš ášši oažžun dihte máksojuvvot ruovttoluotta dan mii lea buorrin. Jus ii máksojuvvo ruovttoluotta addojuvvon áigemearrái, de sáhttet healbanreanttut gáibiduvvot dasa lassin, gč. lága juovlamánu 17. b. 1976 nr 100 reanttuid birra mannonan máksimiid ovddas jna. (forsinkelsesrenteloven/láhka mannonan mávssuid reanttu birra).

§ 12 Evalueren

Sámediggi galgá fuolahit ahte ortnet dárbbu mielde evaluerejuvvo vai oažžu dieduid das doibmet go doarjjaortnegat beaktilit resursageavaheami ja mearriduvvon mihttomeriid dáfus. Dát sáhtta dahkkojuvvot geavaheaddjeiskkademiid čadahemiin suohkaniid/gielddaid dahje fylkkasuohkaniid plánaáigodagaid vuodul, Sámedikki ja suohkana/gieldda/fylkkagieldda gaskasaš čoahkkimiin, ja dasa lassin álbmotčoahkkimiid čadahemiin.

Sámediggi sáhtta dárkkistit ahte ruđat geavahuvvojit eavttuid mielde, gč. Juolludusnjuolggadusaid § 10 nuppi lađđasa.

§ 13 Raporteren

Raporteren galgá čadahuvvot Sámedikki doarjjaportála bokte.

Guovttegielatvuodadoarjaga vuostáiváldi galgá raporteret dahje sáddet Sámediggái čuovvovačča:

- Galli mánás/oahppis mánáidgárddis ja vuoddoskuvllas lea sámegielfálaldat, gč. § 3 Ohcan.
- Bajilgova das makkár ovttaskasdoaimmaid ja prošeavttaid guovttegielatvuodadoarjja lea ruhtadan. Dát sáhtta leat seamma hámis go suohkaniid/gielddaid hálldašanorgánaid raporteren suohkanstivrii/gielddastivrii.
- Suohkaniid/gielddaid plánaid main sámegiella digaštallojuvvo ja gieđahalloyuvvo, gč. § 4 Suohkaniid/gielddaid plánat, ja sámelága § 3-13.

§ 14 Váidinvejolašvuohta

Njuolggodoarjagat eai gula ovttaskasmearrádusaid meroštallamii, gč. hálldašanlága § 2b ja daid ii sáhte váidit.

§ 15 Fápmuiboahhtin

Láhkaásahus lea fámus ođđajagemánu 1. b. 2026 rájes.